

Անվանի գիտնական և մանկավարժ Գրիգոր Ալեքսանի Ղարիբյանը դարձավ 90 տարեկան: Ավարտելով Սյունիքի գյուղական դպրոցը նա անցել է փառավոր ճանապարհ. Երևանի Փ. Թերլեմեզյանի անվան նկարչական ուսումնարան, Երևանի պետական համալսարան, Մոսկվայի Լոմոնոսովի անվան պետական համալսարանի ասպիրանտուրա, ՀՀ գիտությունների ազգային ակադեմիա, հանրապետության մի շարք այլ բարձրագույն ուսումնական հաստատություններ և գիտահետազոտական կազմակերպություններ:

Հայ մտավորականության և, հատկապես, տնտեսագիտական դպրոցի բազմաթիվ ներկայացուցիչներ Գ. Ղարիբյանին համարում են իրենց ուսուցիչ բարձր գնահատելով նրա վաստակը մարդկային կապիտալի զարգացման և երիտասարդ սերնդի կրթության գործում:

Պրոֆեսոր Գ. Ղարիբյանի անցած ճանապարհն արժևորվում է իր գիտաուսումնական հետաքրքրություններին վերաբերող տնտեսագիտության հիմնախնդիրների խոր իմացությամբ, մարդկային հարաբերությունների նրբություններին տիրապետելու և դասավանդելու բնատուր ունակությամբ, ազգային արժեքների պահպանմամբ ու զարգացմամբ մտահոգ հայ մտավորականի նրա տեսակով:

Գ. Ղարիբյանի կյանքի 70 տարիներն անմնացորդ նվիրված են եղել մարդկային կապիտալի զարգացման և մեր երկրի բարգավաճմանն ուղղված հիմնախնդիրներին լուծմանը:

Գիտակրթական ոլորտում ունեցած անուրանալի ծառայությունների համար ՀՀ ԳԱԱ թղթակից անդամ, տնտեսագիտության դոկտոր, պրոֆեսոր Գ. Ղարիբյանը



ԳԻՏՈՒԹՅԱՆ ԵՎ ՄՇԱԿՈՒՅԹԻ ԱՆՎԱՆԻ ԳՈՐԾՉԻ ՀՈՒՅԵԼՅԱՆԸ

պարզևատրվել է «Սովսես Խորենացի» մեդալով, նրան շնորհվել է ՀՀ գիտության վաստակավոր գործչի պատվավոր կոչում: Վաստակաշատ մտավորականը և պատվավոր սյունեցին արժանացել է նաև ՀՀ Ազգային ժողովի, կառավարության, կրթության և գիտության նախարարության, Կենտրոնական բանկի, Գիտությունների ազգային ակադեմիայի, Երևանի պետական համալսարանի, Հայաստանի պետական տնտեսագիտական համալսարանի և Խաչատուր Աբովյանի անվան պետական մանկավարժական համալսարանի ոսկե մեդալների և մի շարք այլ պարգևների:

Գիտական գործունեության ասպարեզում հատկապես կարևորվում է պրոֆեսոր Գ. Ղարիբյանի կողմից դիտարկվող հիմնախնդիրների արդիականությունն ու հետազոտական մտքի խորությունը: Նրա մասնակցությամբ ու ղեկավարությամբ հրապարակված աշխատություններն ու դասագրքերը ուսումնասիրողների և երիտասարդների բազմաթիվ սերունդների համար դարձել են տնտեսագիտության հիմունքների յուրացման կարևորագույն միջոց:

Մեր նորանկախ երկրում պրոֆեսոր Գ. Ղարիբյանը սահուն մուտք գործեց ազատական տնտեսական հարաբերությունների ուսումնասիրությունների ոլորտ, որն իր դրսևորումը ստացավ ինչպես կազմակերպչական, այնպես էլ գիտահետազոտական ասպարեզներում:
Գ. Ղարիբյանը աշխատել է ՀՀ գիտակրթական հեղի-

նակավոր կենտրոններում և հրապարակել է 100-ից ավելի գիտական աշխատանքներ և մենագրություններ: Անկախության տարիներին լինելով համալսարանի ուսումնական աշխատանքները համակարգող պրոռեկտոր՝ նա մեծապես նպաստեց մի շարք ֆակուլտետների և մասնագիտությունների կայացմանը:

Հատկապես մեծ է նրա ավանդը Երևանի պետական համալսարանի կազմում տնտեսագիտության ֆակուլտետի վերաբացման գործում: Դեռևս 1984 թ. պրոֆեսոր Ղարիբյանի ջանքերի շնորհիվ Երևանի ժողովրդական տնտեսության ինստիտուտից տնտեսագիտական կիբեռնետիկայի ֆակուլտետը տեղափոխվեց Երևանի պետական համալսարան և հետագայում, որպես այդ ֆակուլտետի ղեկան, նա ամեն ինչ արեց այն դարձնելու միջազգային ժամանակակից ամենաբարձր պահանջներին բավարարող տնտեսագիտության դարբնոց: Դրա զարգացմանը նպաստեց նաև պրոֆեսոր Ղարիբյանի կողմից տասնամյակներ շարունակ ղեկավարվող տնտեսագիտության գծով գիտական աստիճանաշնորհման մասնագիտական խորհուրդների գործունեությունը:

Գիտնականի հետազոտությունները նվիրված են անցումային տնտեսություններում բնակչության կենսամակարդակի բարձրացման, բաշխման և վերաբաշխման գործընթացների կարգավորման, կապիտալի մախակազմման կուտակման, աշխատանքի շուկայի ձևավորման, մարդկային կապիտալի զարգացման և այլ

հիմնախնդիրներին: Դրանք այն կարևորագույն հարցերն են, որոնք տարբեր ուժգնությամբ կանգնում են կենտրոնացված կառավարման մոդելից ազատական տնտեսական հարաբերություններին անցնող ցանկացած երկրի առջև և որոնց լուծումը պահանջում է քրտնաջան ու հետևողական աշխատանք:

Նշված խնդիրներին զուգահեռ, մի շարք օբյեկտիվ և սուբյեկտիվ հանգամանքներով պայմանավորված, Հայաստանը կանգնեց նաև արտագաղթի հիմնահարցի առջև, որն, անշուշտ, կարող է ունենալ լուրջ բացասական ազդեցություն երկրի ազգային անվտանգության վրա: Այս հարցերի լուծումը ևս գտնվում է պրոֆեսոր Գ. Ղարիբյանի սևեռում ուշադրության կենտրոնում:

Պրոֆեսոր Գ. Ղարիբյանի երկարամյա և բարեխիղճ աշխատանքին, նրա իմաստուն խառնվածքին, մեր համոզմամբ, մեծապես նպաստել է նաև ընտանիքը և հատկապես երջանկահիշատակ տիկին Գայանեն:

Համալսարանական կյանքի հումանիզացման զարգացումներին Գ. Ղարիբյանի արդյունավետ աշխատանքը հատկապես կարևորվել է ԵՊՀ ռեկտոր, ակադեմիկոս Սերգեյ Համբարձումյանի կողմից: Վերջինիս խոսքերով Գրիգոր Ալեքսանդրովիչը, որպես ԵՊՀ պրոռեկտոր, իր պարտականությունները կատարում էր առանց արհեստական բարդացումների, վայելում էր ռեկտորատի և համալսարանականների մեծ հարգանքը, չտրվեց ժամանակի կերպարանափոխություններին, մնաց անդամաճան ու ազնիվ: Դրա արդյունքում ընդունվեցին այնպիսի որոշումներ, ինչպիսիք են համալսարանի ֆակուլտետներում հայոց պատմության դասավանդումը, փիլիսոփայության և սոցիոլոգիայի, օտար լեզուների ֆակուլտետների բացումը, տնտեսագիտության ֆակուլտետի վերաբացումը և այլն: Հատկապես նշանակալից է նրա դերը ԵՊՀ կողմից Արցախի ազատագրական պայքարին աջակցության և օգնության կազմակերպման գործում:

Գրիգոր Ղարիբյանի դերը համալսարանի ուսումնական աշխատանքների համակարգման գործում բարձր է գնահատվել նաև Երևանի պետական համալսարանի հաջորդ ռեկտորների կողմից:

Գրիգոր Ղարիբյանի բազմակողմանի զարգացվածությամբ վկայությունն է նաև, որ նա իր էությանը ոչ միայն կրթության ու գիտության, այլ նաև մշակույթի և գեղանկարչության վառ ներկայացուցիչ է: Ինչպես պատկերավոր նշել է արվեստագիտության դոկտոր, պրոֆեսոր Լևոն Զուգասոյանը, «յուզաներկով արված նրա ստեղծագործությունները կատարված են մասնագիտական հմտությամբ. ասես վաստակաշատ գիտնականը ողջ կյանքում միայն նկարելով է զբաղվել»: Դրա վկայություն պետք է համարել վերջինիս գեղանկարների անհատական ցուցահանդեսները, հատկապես ԵՊՀ-ի 100-ամյակին նվիրվածը: Նա գույների և գծերի կախարհիչ աշխարհի մարդ է, որի նկարներից մեր առջև հառնում են հայրենի բնության գեղատեսիլ վայրերը, նրա ժայռերն ու ծաղիկները, ամրոցներն ու հիմնավորը կառույցները:

Յու. Ս. ՍՈՒՎՈՐՅԱՆ
ՀՀ ԳԱԱ հայագիտության և հասարակական գիտությունների բաժանմունքի ակադեմիկոս քարտուղար

Վ. Բ. ԲՈՍՏԱՆՋՅԱՆ
Տնտեսագիտության դոկտոր, պրոֆեսոր